

Qual' semu

Vicu a tarra assuffucà
Da l'ingurdìzia umana,
Chì l'omu sfaci è spiana
Senza nissuna dignità,
A natura chì tempi fà
Di tuttu fù a suvrana.

Chì l'urgogliu avvilena
Sfendu à un puntu stremu,
U pegnu chì lasciaremu
À quiddi chì so à vena,
Ma pà suminà a pena
Nant'à issu mondu qual' semu ?

Qual' semu pà malminà
Inquinà ò sradicà,
Ciò chì fù sin'avà
Splindori è binistà ?
Qual' emu in virità
Pà ghjudicà ò stirpà,
Senza cura ne pietà
U fà di l'umanità ?

Sentu i lagni dulenti
D'ugni locu chì si mori,
Sfraiatu senza rancori
Da u soldu praputenti,
Chì introna ugni menti
E acceca ugni cori.

Di perda ciò chì tandu fù
Oghji più chì mai temu,
Chì pà u puteri scemu
Si trascura ugni virtù,
Ma sia eu quant'è tù

Nant'à issu mondu qual'semu ?

Qual'semu pà malminà
Inquinà ò sradicà,
Ciò chì fù sin'avà
Splindori è binistà ?
Qual'semu in virità
Pà ghjudicà ò stirpà,
Senza cura ne pietà
U fà di l'umanità ?